



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

JSMP kondena maka'as atuasaun ekipa SEATOU ne'ebé ho brutalidade destroi sasan negosiante dalan ninin sira no husu vítima sira apresenta denuncia ba Ministériu Públiku

JSMP kondena maka'as atuasaun ekipa SEATOU ne'ebé ho brutalidade destroi sasan negosiante dalan ninin sira iha tempu kalan. JSMP manifesta solidaridade kle'an ba vítima sira inklui labarik sira ne'ebé sofre todan traumátiku no psikolójiku oioin durante atuasaun ne'e. Ami sente sokadu akompaña atuasaun ne'ebé fora hosi limite no la iha sensibilidade ba labarik sira ne'ebé tanis assiste atuasaun brutál ne'e.

Kazu ne'e, sériu no iha implikasaun multi setorál ba kredibiliadde instituisaun estadu nian, tanba estadu liuhosi ninia aparelu sira lakon kapasidade no kreatividade atu buka solusaun pasifika no tuir lei hodi solusiona interese estadu kona-ba polítika ordenamentu teritoriál, saúde públika, preparasaun ba vizita Amo Papa nian no nesesidade povu negosiante ki'ik sira nia moris loron-loron nian.

Atuasaun ne'e la aseitável ho razaun saida de'it tanba atuasaun ne'e esesivu (liuhosi limite), kruél no dezumana. Atuasaun ne'e reprezenta violasaun grave ba direitu báziku povu nian atu buka moris. Alende ne'e, aktu hirak ne'e konstitui nu'udar krime tanba halo estragus sistemátiku ba comunidade negosiante ki'ik sira sasan no uza forsa esesivu ka violénsia hasoru negosiante sira.

"Timor-Leste nu'udar estadu direitu demokrátiku, la'ós rejime ditadura. Nu'udar estadu direitu, nia konsekuénsia lójika mak kualkér asaun no intervensan estadu nian tenke proporsionál, bele sukat no liuliu tenke bazeia ba lei. Tanba ne'e, elementu ka aparelu estadu hotu-hotu iha obrigasaun atu kumpre lei aplikável iha nasaun ida ne'e la'hó esesaun". Tanba ne'e, JSMP kondena maka'as atuasaun ne'e, dehan Sr. Casimiro dos Santos, Diretór Ezekutivu Interinu JSMP.

Konsidera katak atuasaun ne'e konstitui krime relevante sira ne'ebé defini iha artigu 258 Kódigu Penál (KP) kona-ba danu simples, artigu 259 KP kona-ba danu agravadu ka potencialmente artigu 260 KP kona-ba danu ho violénsia ne'ebé bele utiliza atu loke prosesu hasoru elementu ka pesoál sira ne'ebé halo atuasaun no kauza danu ka prezuiju ba comunidade sira nia sasan no saúde fízika.

Krime hirak ne'e bele hetan pena prizaun tinan tolu ka multa ba krime danu simples, tinan 2 to'o tinan 8 ba danu agravadu no tinan 4 to'o tinan 12 ba danu ho violénsia no depende ba ninia sirkunstânsia no kauzu hosi atuasaun ne'e.

Hare hosi video ne'ebé viral no sirkulá masivamente iha públiku no faktu sira ne'ebé fó sai liuhosi kanal mídia sosiál oioin hatudu katak atusaun ne'e bele

konstitui krime danu ho violénsia ne'ebé rezulta kondensasaun ba pesoál sira hosi tinan 4 to'o 12 prizaun.

Aktu hirak ne'e mós bele konstitui krime ofensa ba integridade fízika ne'ebé estipula iha Kódigu Penál.

Tanba ne'e, JSMP enkoraja vítima sira atu lori autór (pesoál) sira ne'ebé atua fora hosi orden no nesesidade ba ministériu públiku no mós ezije responsabilidade institusionál hosi autoridade superiór irarkiku ne'ebé falla atu orienta nia subordináriu sira iha terrenu.

JSMP mós husu ba Provedoria Direitu Umanu no Justisa atu kontinua proativu liu hodi halo koordinasaun no akompañamentu regulár ba ekipa sira iha terrenu atu asegura katak atuasaun sira ne'e proporsionál, bele sukat no tuir lei.

Partisipasaun no envolvimentu PDHJ nian ne'e inklui atu fasilita vítima no comunidade negosiante afetadu sira ba autoridade relevante sira hodi asesu ba assisténsia relevante no apresenta denúnsia ba Ministériu Públiku atu loke prosesu hasoru autór sira ne'ebé envolve iha atuasaun ne'e.

Atu hetan informasaun kompleitu, favór kontaktu:

Casimiro dos Santos

Diretor Ezekutiva Interino JSMP

Diresaun e-mail: casimiro@jsmp.tl

Telefone: (+670) 33238883 |

Website: <https://jsmp.tl>

info@jsmp.tl

[@pengikut@sorotan](#)